



Broj:KSI-09-272/26

Datum: 19.08.2026. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21 i 18/26) i člana 25. stav (2) Poslovnika o radu Komisije za odlučivanje o sukobu interesa, postupajući po prijavi S.Đ. od 04.08.2026. godine, podnesenoj protiv A.D., direktora JP „Komunalno Brčko“ d.o.o. Brčko distrikta Bosne i Hercegovine, nosioca javne funkcije, radi utvrđivanja sukoba interesa, Komisija za odlučivanje o sukobu interesa, na 158. sjednici održanoj dana 19.08.2026. godine, donosi

ODLUKU

Postupak za odlučivanje o sukobu interesa protiv A.D., direktora JP „Komunalno Brčko“ d.o.o. Brčko distrikta Bosne i Hercegovine, nosioca javne funkcije, neće se pokrenuti, obzirom da iz dokumentacije i radnji ne proizilazi da je u postupanju došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

Образложење

Dana 04.08.2026. godine postupajući po prijavi S.Đ., Komisija za odlučivanje o sukobu interesa pokrenula je postupak broj: KSI-09-272/26, radi sumnje na povredu odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanje sukoba interesa na strani A.D., direktora JP „Komunalno Brčko“ d.o.o. Brčko distrikta Bosne i Hercegovine, nosioca javne funkcije. U dostavljenoj prijavi, između ostalog navodi se da je A.D. kao nosilac javne funkcije, privatni interes stavio iznad javnog interesa, zloupotrebio javna ovlaštenja u JP „Komunalno Brčko“ d.o.o. Brčko distrikta Bosne i Hercegovine, kao i počinio finansijske malverzacije i da kako u prijavi navodi Zakon o sprečavanju sukoba interesa u institucijama Brčko distrikta Bosne i Hercegovine jasno propisuje da odgovorno lice ne smije donositi odluke u situaciji u kojima njegov privatni interes utiče ili može uticati na zakonitost, otvorenost i nepristrasnost u obavljanju javne funkcije te dalje navodi da je direktor A.D. dana 27.07.2026. godine (akt br. INT-02.01-00335/26) iskoristio svoja direktorska ovlaštenja i donio Odluku o pokretanju disciplinskog postupka protiv njega, kao osobe koja ga prijavljuje za korupciju. Time je pravni mehanizam preduzeća iskoristio kao oružje za lični interes, a da je direktor ukoliko je smatrao da je prijava neistinita, mogao upotrijebiti svoj privatni lijek tužbu za klevetu pred Osnovnim sudom Brčko distrikta Bosne i Hercegovine. Smatra da je korištenje Disciplinske komisije javnog preduzeća u ovu svrhu gruba zloupotreba i sukob interesa. Kao direktna posljedica direktorove nezakonite Odluke o pokretanju disciplinskog postupka imenovan je M.H. jedan od zaposlenika u JP „Komunalno Brčko“, d.o.o. Brčko distrikta Bosne i Hercegovine, kao predsjedavajući Disciplinske komisije (akt broj. 02.02-01200/26) te je donio odluku o zakazivanju javne rasprave za 21.08.2026. godine uz direktnu prijetnju da će se ista održati bez njegovog prisustva, svjesno ignorišući činjenicu da se on nalazi na medicinski opravdanom bolovanju i da ima status zaštićenog prijavitelja korupcije. Njegovo učešće u ovom postupku kao

predsjedavajućeg Disciplinske komisije je kompromitovano neotklonjivim sukobom interesa i ličnim animozitetom.

S tim u vezi, podnosilac prijave zahtijeva da Komisija u vezi sa navedenim, u okviru svojih zakonom propisanih nadležnosti, preduzme odgovarajuće aktivnosti radi ispitivanja navoda iz prijave.

Članom 2. tačkom a) Zakona o sprečavanju sukoba interesa u institucijama Brčko distrikta Bosne i Hercegovine propisano je da „sukob interesa“ postoji kad nosilac javne funkcije ima privatni interes koji utiče, može uticati ili se stvara utisak da utiče na obavljanje javne funkcije.

Članom 2. tačka c) Zakona o sprečavanju sukoba interesa u institucijama Brčko distrikta Bosne i Hercegovine propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da A.D. obavlja funkciju direktora JP „Komunalno Brčko“ d.o.o. Brčko distrikta Bosne i Hercegovine na osnovu Odluke broj: 01-00465/25 od 24.02.2025. godine, te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine. Druga navedena osoba u prijavi nije registrovana u Registru javnih funkcija i nosilaca javne funkcije, te prema tome nije nosilac javne funkcije i nije u nadležnosti Komisije.

U cilju provjere navoda iz prijave da li postoji sukob interesa, Komisija je po prijavi pokrenula postupak provjere navoda i uputila 05.08.2026. godine zahtjev za dostavu podataka broj: KSI-09-225/26 javnom preduzeću „Komunalno Brčko“ d.o.o. Brčko distrikta Bosne i Hercegovine zahtijevajući podatke o tome da li je, a shodno članu 10. Pravilnika o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine, donesena odluka o imenovanju Disciplinske komisije, kao i informaciju o tome da li je navedena komisija imenovana kao stalna komisija na duži vremenski period ili privremena komisija koja se formira od slučaja do slučaja, te zahtijevala da Komisiji dostave kopiju odluke o imenovanju članova Disciplinske komisije, odnosno sastav Disciplinske komisije u slučaju predmeta INT-02.01-00335/26 od 27.07.2026. godine, te osnov pokretanja disciplinskog postupka ukoliko je to moguće, kako bi bila upoznata s razlozima zbog kojih je pokrenut navedeni disciplinski postupak, u cilju razjašnjenja navoda iz prijave.

Postupajući po zahtjevu Komisije, javno preduzeće „Komunalno Brčko“ d.o.o. Brčko distrikt Bosne i Hercegovine aktom broj: 02.01-01387/26 od 12.08.2026. godine dostavilo je odgovor u kojem navodi da je članom 11. Pravilnika o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine, direktor još 26.06.2025. godine donio odluku o imenovanju članova Disciplinske komisije i njihovih zamjenika na neodređeno vrijeme, a u vezi sa članom 10. Pravilnika o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine. Nadalje navode da je u vrijeme donošenja Odluke o pokretanju disciplinskog postupka broj INT-02.01-00335/26 od 27.07.2026. godine na snazi bila navedena Odluka o imenovanju članova disciplinske komisije i njihovih zamjenika broj INT-02.02-00291/25 od 26.06.2025. godine, a da je direktor donio novu Odluku o imenovanju članova disciplinske komisije i njihovih zamjenika broj INT-02.02-00350/26 od 11.08.2026. godine, kojom je imenovao novi sastav disciplinske komisije kojom je raniju Odluku o imenovanju članova disciplinske komisije i njihovih zamjenika stavio van snage. Navedene odluke su priložene i izvršen je uvid u njih, te utvrđeno da M.H. 11.08.2026. godine nije član niti zamjenik Disciplinske komisije.

Takođe, navedeno je da je disciplinski postupak protiv zaposlenika pokrenut zbog učinjene teže povrede radne obaveze iz člana 8. stav (2) Pravilnika o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine – izvršenje sigurnosnog prekršaja koji označava postupanje suprotno pravilima i procedurama propisanim u zakonskim, internim ili aktima sistema upravljanja sigurnošću informacija (ISMS), a posebno

ugrožavanje sigurnosti ličnih podataka koje prikuplja i obrađuje preduzeće, te da postoje indicije da je navedeni zaposlenik vršio nezakonitu obradu ličnih podataka drugog zaposlenika.

Članom 31. Statuta JP „Komunalno Brčko“ d.o.o. Brčko distrikta Bosne i Hercegovine propisano je da direktor preduzeća ima sljedeće nadležnosti: organizacija i vođenje poslova preduzeća; izvještavanje Upravnog odbora preduzeća na zahtjev upravnog odbora; provedba statuta; izrada i nadgledanje realizacije godišnjeg i dugoročnog plana poslovanja; izrada provedbenih propisa za postupak nabavki i provedba važećih zakona i propisa o postupku nabavke; priprema prijedloga o raspodjeli dobiti i dostavlja Upravnom odboru na usvajanje; priprema prijedlog cijena roba i usluga u skladu sa zakonom i drugim propisima; zapošljavanje i otpuštanje zaposlenika u skladu sa postupcima utvrđenim pravilnicima te važećim zakonima; zastupa i predstavlja preduzeće u unutrašnjem i vanjskotrgovinskom prometu; predlaže razvojnu i poslovnu politiku; predlaže planove rada i program razvoja i preduzima mjere za njihovo sprovođenje; staranje i odgovornost za zakonitost rada preduzeća: distribucija i implementacija etičkog kodeksa u preduzeću; priprema prijedloge akte iz nadležnosti upravnog odbora; sprovodi odluke Upravnog odbora; donosi opšte akte koji nisu u nadležnosti upravnog odbora; donosi pojedinačne akte kojima se rješava o pravima i obavezama zaposlenika preduzeća; zaključivanje ugovora u ime preduzeća; odgovara za zakonitost rada preduzeća; obavljanje poslova iz svog djelokruga u interesu preduzeća i vođenje poslova iz svog djelokruga s pažnjom dobrog privrednika te u skladu sa etičkim kodeksom.

Članom 8. stav (1) Pravilnika o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine propisane su teže povrede radne obaveze i to: izvršenje sigurnosnog prekršaja koji označava postupanje suprotno pravilima i procedurama propisanim u zakonskim, internim ili aktima sistema upravljanja sigurnošću informacija (ISMS), a posebno ugrožavanje sigurnosti ličnih podataka koje prikuplja i obrađuje preduzeće.

Članom 10. stav (1) i (2) istog Pravilnika propisano je da za vođenje postupka o lakšim povredama radne obaveze odlučuje Direktor Preduzeća, a o težim povredama radne obaveze odlučuje Disciplinska komisija, koju imenuje Direktor.

Članom 11. istog Pravilnika propisano je da Disciplinska komisija ima 3 člana i isto toliko zamjenika (koji zamjenjuju članove u slučaju njihove odsutnosti) te zapisničara i njegove zamjenike (koji zamjenjuju u slučaju njegove odsutnosti) koje Direktor imenuje odlukom.

Naime, Komisija analizirajući zakonske odredbe i druge pozitivne propise te same navode iz prijave ne nalazi povredu odredaba Zakona o sprečavanju sukoba interesa, a u vezi sa članom 2. Zakona da privatni interes utiče na obavljanje javne funkcije u ovom slučaju, jer disciplinski postupak, radi teže povrede radne obaveze vodi Disciplinska komisija, a ne direktor, odnosno odgovorno lice u preduzeću na način, kako je to navedeno u prijavi. U ovom slučaju radi se o težoj povredi radne obaveze, propisane Zakonom o radu Brčko distrikta Bosne i Hercegovine i Pravilnikom o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine.

Imajući u vidu sve naprijed navedeno, takođe je utvrđeno da prijava nije potkrijepljena činjenicama i dokazima koji bi ukazivali na postojanje okolnosti propisanih Zakonom o sprečavanju sukoba interesa u institucijama Brčko distrikta Bosne i Hercegovine. Činjenica o nedozvoljenosti pokretanja disciplinskog postupka i učestvovanje u istom postupku, protiv podnosioca prijave, obzirom da se lice nalazi na medicinski opravdanom bolovanju i koje ima status zaštićenog prijavitelja korupcije, nije definisana odredbama Zakona o sprečavanju sukoba interesa u institucijama Brčko distrikta Bosne i Hercegovine, te Komisija nije cijenila navedene okolnosti i činjenice u ovome postupku, obzirom i da Zakon o radu Brčko distrikta Bosne i Hercegovine ne sadrži odredbu o zabrani vođenja postupka u tom slučaju niti izuzimanju takvih lica od vođenja disciplinskog postupka u slučaju povreda propisanih Zakonom o radu Brčko distrikta Bosne i Hercegovine kao ni Pravilnikom o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine.

S tim u vezi, navodi iz prijave, su neutemeljeni, proizvoljni, bez zakonskog uporišta i nisu predmet odredaba Zakona o sprečavanju sukoba interesa u institucijama Brčko distrikta Bosne i Hercegovine.

Iz navedenog ne proizilazi niti postojanje privatnog interesa niti ostvarivanje koristi koja bi uticala ili mogla uticati na obavljanje javne funkcije i dovela do sukoba interesa te stavljanja privatnog iznad javnog interesa u smislu odredaba navedenog Zakona. Navedene okolnosti odnose se isključivo na nadležnosti direktora preduzeća i slučaj povrede radnih obaveza zaposlenih propisani gore navedenim zakonskim i podzakonskim propisima, naročito Statutom JP „Komunalno Brčko“ d.o.o. Brčko distrikta Bosne i Hercegovine, Zakonom o radu Brčko distrikta Bosne i Hercegovine i Pravilnikom o disciplinskoj odgovornosti zaposlenika JP „Komunalno Brčko“ d.o.o. Brčko distrikta Bosne i Hercegovine.

Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. S. Đ., ulica [REDACTED],
2. Internet stranica Komisije,
3. Evidencija,
4. Arhiva.